

NA NQATAXACPI NA YOTTA'A'T SHIYAXAUAPI MAYI NETALEC ANA 'ALHUA

Na Hua' auchiguii N'aqtacpi

Cha' ayi qaŷaŷateeta de'eda huesochiguii nataxac, qataq da huo'o ca qai'ot ŷaŷamaqchiguii, qataq da nlagaxayic mayi huetalec ana 'alhua, chigoqchigui, qataq da 'eetec da qaica da huo'o ca napacalec ca lŷa, huo'otac da qaŷacona ca lalamaxat i 'oonolec 'enauac na shiŷaxauasat.

Qataq qaŷaŷateeta da souaxat ca saqaŷaŷateelec lataxac, qataq da qaŷl'ina 'I da lataxac ca shiŷaxaua, da nachida da chigoqchigui da qai'otec ca qauem qataq da saqaiyacnapec na ŷale, ŷoqo'oyi namayipi sa ishita da pal da lavilŷaxac, qataq souaxat da qanasachigui nagui da qalapaxai da qaŷauotaique no'on llic na shiŷaxauasat, qataq naua aq naidauo na'axa'te mayi heutoiguilo da 'enauac na shiŷaxauapi ŷataqta huesochiguii qanqoŷin, imeuo da lcolanaxa qataq da lachoxoyic, qataq sa ishita da qoŷinapega souaxat ca l'aqtac qataq souaxat ca l'amqaanataxanaxac.

Qataq iuen da ne'ena maichi lataxac na shiŷaxauapi ŷataqta qanpaxatalec qataq qai'ot ca llic, yaqto' ca shiŷaxaua sa ishita da l'ot ca sa lhuennataxa, huaa nachi ishita da dataŷa 'aguet cam sa ishita da dechxonntaxan huo'otac ca huetaiya' naq'en ca lŷa.

Qataq iuen da qalapaxai da qai'ot ca llic da yaqto' nhuoteeta't 'enauac na netalguete naua ŷotta 'a't 'ale'u.

Cha' ayi ne'ena ŷotta 'a't shiŷaxauapi mayi hueto'ot na huaxaŷa't nta'alpi, na mayipi mashi sogote da nasachigui da ŷirei da l'aqtac da 'enapec ŷataqa pi'iŷa'a ne'ena l'atchiguii maichi lataxacpi na shiŷaxauapi, qataq da maichi l'amaqchic i 'oonolec, qataq da lta'adaic naigui i 'oonolec, qataq da 'eetec na mavipi da qaica da huo'o ca napacalec ca lŷa, na ŷale qataq ana 'alo, qataq na mayipi l'axateec de'eda l'aqtac da yaqto' qai'ot ca llic da ŷaŷamaxai qanqoŷin na shiŷaxauapi qaica ca iueetac, yaqto' ca shiŷaxaua ŷataqta huesochiguii.

Qataq ne'ena nta'alpi mayi ŷalectau'a de'eda qai'ot, na mayipi ŷan da l'aqtac da 'enapec itauan da l'onataxanaxac nam huaxaŷa't nta'alpi, da yaqto' ŷataqta qantela'a de'eda maichi lataxac nam netalguete naua ŷotta 'a't 'ale'u, qataq huesochiguii da l'ottac ca maichi laŷaanataxanaxac na shiŷaxauasat, qataq.

Qaŷaŷateeta da 'enauac ne'ena 'eeta'a't nhuennataxacpi qata ne'ena maichi lataxac na shiŷaxauapi, qataq da 'eetec da huesochiguii na mayipi, ŷataqta huo'o ca lta'araic naigui da ŷataqta qaipacchigui qai'ot, cha'avi maichi n'aqtac.

De'eda ima'a't ltaxaŷaxac na Nta'alpi

Lapaxai ne'ena n'aqtacpi mayi mashi qanasachigui da yaqto' mpaxatalec da maichi lataxac ma ŷotta't shiŷaxauapi, cha' ayi ŷataqta 'enauac da 'eeta'a't da lhuennataxac na mayipi, qaq ŷoqo'oyi iuen da 'enauac na shiŷaxauapi ŷotta'a't na l'aqtac n'aaxata 'a't, yaqto' i 'oonolec na mayipi hua'otac na nocittagui ca l'onataxanaxac, ishita da nachi 'eetai' tatapigui lauel damayi, qataq ishita da huelec da l'ot, chigoqchigui naq'en ca paxaguenaxac, qataq da na paxaguenataxanaxac, qataq ipacchigui naq'en damayi, da ishita da nquigaxattashiguem ca l'ot cam qanayiuta'a 'alhua, qataq naua lŷa't 'ale'u, da yaqtohuo'o da nuattonaguec qataq da qaipacchigui da qai'ot ivida'alo naua lŷa't 'ale'u mayi nataq'en nanettau'a de'eda, qataq naua lŷa't 'ale'u qanayiitalguete mayi hueto'oto da lamaxasoxonaxac ne'ena nta'alpi.

ARTÍCULO 1

'Enauac na naaxat shiŷaxauapi na mayipi huesochiguii qataq 'eeta'a't da l'amaqchic qataq da 'enec qataq ŷataqta ŷaŷate'n naua lataxaco qataq nua no'o'n nvilŷaxaco, qaq ŷoqo'oyi iuen da i 'oonolec ŷataqta itauan ichoxoden ca lŷa

ARTÍCULO 2

'Enauac na shiŷaxauapi ŷalectau'a 'enauac ne'ena lataxaguesat qataq da 'eetec da huesochiguii qanqoŷin namayipi mayi mashi qanasachigui qataq qoŷidelec ana'ana nede, qaica da huo'o ca qaiŷotauga 'enauac na shiŷaxauasat na'aictaga ca 'eetec ca l'ogueyaxac ŷale qataq 'alo, qataq naua l'aqtaqa nataq 'en da l'amqajnataxanaxac huo'otaq da 'eetec cam laŷaanec huo'otaq da 'eetec ca lŷa naŷaanataxanaxac, qataq cam chigoqta'a 'alhua, huo'otaq cam chigoxoigui, sallaxanec huo'otaq choxodaq huo'otaq cam lŷa lataxac.

Nataq'en sa ishita da huo'o ca qaiŷotauga huasoilec da llic ca laŷaanataxanaxac huo'otaq na ŷotta'a't llic na lataxaguesat cam 'alhua mayi netaa ca shiŷaxaua, nachi 'en 'am da huo'otaq netaa ca 'alhua mayi nalamaxat qoŷittalec na alaapi huo'otaq da chochi qaipataxalec da ilotague', qalaxayi sa ishita da ŷaqauga huo'otaq da 'ico 'noxonecpi hueto'ot da lamaxasoxanaxac ca nta'a mayi ilotague que'eca 'alhua.

ARTÍCULO 3

'Enauac i 'oonolec na shiŷaxauasat nhuanau'a da ntaunaguec da nachaalataxac, qataq ŷataqta huesochiguii, qataq ŷataqta qantela'a da nachaalataxac.

ARTÍCULO 4

Qaica da huo'o ca 'ico' nlatac huo'otaq da chochi qaŷamaqtac cha'ayi de'eda 'eetec ca nlatac huo'otaq da llic da chochi qaŷamaqtaq damayi nagui sa ishita da qaŷashiita da qai'ot.

ARTÍCULO 5

Qaica da huo'o ca qaŷauo'o ca nhuaxanaguec huo'otaq da qai'ot ca ncoitaguec huo'otaq da saqaichidapec, qaica ca qoŷanaigui qataq saqaiyacnapec.

ARTÍCULO 6

'Enauac na shiŷaxauasat sa ishita da qaillapeguem da huo'o ca taigue, na 'aicta xa da ŷaqa'a ca hueta'a, qalaq qailo'oguet cha'ayi n'attau'a 'enauac na lataxaguesat.

ARTÍCULO 7

'Enauac na shiŷaxauasat 'eeta'a't qaica da huo'o ca napacalec ca lŷa souaxat na ŷotta'at llic na nqataxacpi, sa ishita da qaiŷottacachi namayipi cha'ayi nachi 'eeta'a't da hueto'ot na ŷotta'a't nqataxacpi. 'Enauac 'eeta'a't da hueto'ot da ltelaqtaxanaxac na nqataxacpi, qaica da huo'o ca qaiŷottapeuga huo'otaq da saqaipaguelec ne'ena n'aqtacpi mayi qoŷittai.

ARTÍCULO 8

'Ennauac na shiŷaxauasat ishita da l'ot ca llic ca l'aqtac da ŷaneu'a na aloico l'o'pi nta'alpi mayi ilotague' cam 'alhua, da yaqto' ca mayi qanpaxatalec sa ishita da qan'aqchit cha'ayi mashi n'attau'a na nqataxacpi mayi l'ot da qailo'oguet camayi, mayi n'attalecpi que'eca 'alhua.

ARTÍCULO 9

Qaica da huo'o ca chichi qaỹacoolec da qaicoi', qaỹapou'a, huo'otaq da qai'odauec nachi ca llalaqpi, cha'ayi ca mayi huo'o naq 'enec da yi'oqchigui nachaalataxac, yoqo'oyi iuen da qaỹaỹamaxatchiguii ca qai'otec, huo'otaq qai'otec ca lỹalataxac mayi ishit da mpaxatalec da lataxac ca mayi. 'Enauac na shiỹaxauasat sa ishit da huo'o ca qaillapeguem da huo'otaq l'ada't ca laỹipi da yaqto' nachajlec qataq da deqalaec cam 'eetapeguec camayipi.

ARTÍCULO 10

Enauac na shiỹaxauapi ishit da huo'o ca l'ot, cha'ayi namayipi nachi 'eeeta'am na laỹipi, da ishit da qan'axaỹaxana ca 'enapec, qataq da qai'otec cam yaỹamaqchiguii lataxac, huaa qanqoỹin ca yaqauga l'onataxanqa' nam loicnatac na aloicpi, mayi yaqauga da yagto' qaỹaỹamaxaji ca llic da lataxac camayi, qataq cam ishit da l'ot lataxac, huo'otaq da qanmit cam negue't ca lataxac mayi qaỹaqtapeguelec camayi, mayi iuen da qaidolec nam lataxacpi mayi l'ot ca llic na lasouaxashitpi.

ARTÍCULO 11

Enauac na shiỹaxauapi mayi huo'o cam chochi qaỹasaqtapeguelec ishit da chochi qampaxatalec da huo'otaq saxanaxa da yōqta qaỹaỹateeta cam lasouaxashit da 'eesa, qaipacchigui ca 'enapec nam nqataxacpi qataq da llic da qanmit camayi, da huo'otaq saxanaxa da yōqta qaỹaỹateeta da ishit da dataỹa'aguet cam qaỹasaqtapelec lasouaxashit camayi.

Saishit da huo'o ca qaỹauo'o ca nhuaxanaguec souaxat cam l'ot, huo'otaq da huo'o ca lataxac saipaguelec, da huaqchigui da huo'o ca qai'ot mayi saishit da 'iso' na'aqchit nam lataxaguesat, mayi ishit da yashiita cam qanayiuta'a 'alhua huo'otaq cam lỹa 'alhua. Nataq'en saishit da qaỹasaxalec ca nhuaxanaguec lta'adaic mayi sanatenguet da lataxac co'ollaq qaitaxaỹapigui que'eca lasouaxashit.

ARTÍCULO 12

Qaica da huo'o ca qai'igueeta'a da huo'o ca qai'otec salataxac da lalamaxat nachaalataxac, huo'otaq na llalaqpi, qataq ca lma', qataq da qaimeten aca lede, huo'otaq da qaishigueeta'a da no'on lataxac camayi, huo'otaq da no'on n'aqtaguec cha'ayi 'enauac na shiỹaxauapi iuen da ntela'a qanqoỹin na lataxacpi mayi l'ot na llic cam chochi nshiguenataxanaxac huo'otaq nshiunaxanaxac.

ARTÍCULO 13

'Enauac na shiỹaxauapi ishit quenhuotapigui' qaica ca 'eetega qataq ishit da maichi lca'aigue cam naa que'eca 'alhua mayi hueta'a.

'Enauac na shiỹaxauapi ishit da ca'ai cam hueta'a 'alhua, nachi 'en'am cam hueta'a ishit da huo'o taỹa lỹa 'alhua, qataq ishit da yI'iguelaxa cam chigoqchiguina 'alhua.

ARTÍCULO 14

Da huo'otaq huo'o ca qaicaatac, qalaq 'enauac na shiỹaxauapi ishit da nmitaique ca lli'iguenqa', qataq iuen da yataqta machigui qanqoỹin, nai'ctaxa cam hueta'a 'alhua.

Qalaxayi de'eda lataxac saishit da qai'ogoxona da huo'otaq qaỹataỹa'aguet ca l'ot nam loicnatac na lataxaguesat, da huo'otaq yataqta 'eesa cam qai'ot nasouaxashit huo'otaq cam lỹa lataxac mayi dataỹa'aguet name lataxacpi mayi nasachigui co'ollaxa nam yotta

'a' t nta 'alpi mayi huaxaŷa' t.

ARTÍCULO 15

'Enauac na shiŷaxauapi ishít, da nanedeuo cam hueta' a 'alhua.

Qaica da huo' o ca ishít da saqaŷashinem da nanedaxac cam hueta' a 'alhua, huo' otaq da nadalaxat da nanedeu' a ca lŷa' alhua mayi sa ishít da lma'.

ARTÍCULO 16

'Enauac na ŷale qataq ana 'alo da ivita da mashi ŷl qalaq ishít da saqaillapeguem ca l'ot souaxat da nqomshaxac huo' otaq cam chigoxoigui huo' otaq souaxat ca l'amqajnataxanaxac, nachi sa qaŷashinem da huadon uo' otaq da ŷauo' o na llalaqpi, huo' otaq da saqaŷalemaxat de'eda ladonaxac, da a nca' altaic ca mayi, huo' otaq da nalte' aca lhua.

Nachaqdata da ŷoqta huesochiguini camayi huo' otaq da ŷataqta ŷaŷamaxadeeta ca l'ot, nachi ishít da qaltaq huadon.

Cha' ayi ne' ena huadoota' a' tpi qataq na llalaqpi namayipi nachina na qanayiutapeguelec qataq nachina na 'ico' nllitai 'enauac na shiŷaxauapi cam qanayiuta' a qataq namayipi iuen da ŷataqta qampaxatalec que' eca qanayiuta' a 'alhua.

ARTÍCULO 17

'Enauac nashiŷaxauapi ishít da ŷauo' o na maiche lalamaxatpi, huo' otaq da nhuaata' ai' ca lŷa.

Qaica da huo' o ca chochi qaŷacojlec da qaillapeguem ca maichi lalamaxat.

ARTÍCULO 18

'Enauac na shiŷaxauapi saishít da qaillapeguem da huesochiguui lataxac da lhuennataxac, huo' otaq da lavilŷaxac qataq ca l'amqajnataxanaxac, nataq' en saishít da qaillapeguem da nadalaxat cam l'amqajnataxanaxac huo' otaq da lpi' iŷaxac, nataq' en saishít da qaillapeguem da ŷachaxan ca lpi' iŷaxac huo' otaq da l'amqajnataxanaxac, nai>>ctaxa da 'oonolec camayi hue' otaq da huaxaiguet na laŷipi, nachi 'en' am da ŷataqta nachaxaata huo' otaq da saishít da nachaxaata, souaxat da napaxaguenataxanaxac, qataq da llic da huo' o ca l'ot, huo' otaq da ŷataqta ilotelec da llic cam l'amqanataxanaxac.

ARTÍCULO 19

'Enauac na shiŷaxauapi saishít da qaillapeguem da l'axat da lhuennataxac huo' otaq da huo' o ca l'aqtac; qaq de'eda 'eetec da saishet da qoŷinapega damayi ivida' a nataq' en da saishet da huo' otaq saqaŷalemaxat camayi souaxat cam lhuennataxac mayi l'axateec co' ollaxa, qataq saishet da huo' otaq qanmittac, qataq camayi ishít da huo' o ca l'axateec lhuennataxac, na' aictaxa da qaŷoqtegeu ivida' a ca lŷa 'alhua, qataq ishít da ŷachalec aca camachaqa lmalate na na' axaŷaxacpi.

ARTÍCULO 20

'Enauac na shiŷaxauapi ishít da ŷalegueu' a da huo' o na ntaxaŷaxac, huo' otaq da ŷalegoigui da huo' o ca naneda' t shiŷaxauapi, da l'ot da llic cam 'eetapeguec ŷaŷamaqchiguui.

Qaica da huo' o ca chochi naŷamaxalec da nanedeu' a qanqoŷin da huo' oi ca naneda' t shiŷaxauapi.

ARTÍCULO 21

'Enauac na shiŷaxauapi ishít da do'onoataxaneu' a da l'onataxanaxac ca nta' a mayi ilotague' ca 'alhua cam hueta' a, ishít da maichi huapegue' da detaxaŷapegue' ca nta' a, huo' otaq da ŷauota' a ca ltaxaŷanexanec mayi maichi lca' egueshic.

'Enauac na shiŷaxauapi saishít da qaillapeguem da huo' o ca inoxoneu' a cha' ayi nachi 'eeta' am 'enauac na laŷipi shiŷaxauapi da ishít da huo' o ca lo' onataxanaxac que' eca 'alhua mayi hueta' a.

Da lasataxac 'enauac na shiŷaxauapi nachida da l'ot da l'aaxac ca nta' a mayi ilo'ogue 'enauac namayipi, de'eda nasataxac damayi da qai'ot qalaq ŷataqta qaŷaŷamaxatchiguii da nallida' t qanqoŷin, qataq da qaŷahuo' oi naua laloqo' te qanqoŷin de'eda allitaxac, de'eda allitaxac l'ot da qaŷatalec cam dauegaxan ŷaguec na nale, qataq saishít da qaŷauaachigui qanqoŷin cam nallij i 'oonolec, huo' otaq da qaŷahuota' a cam lŷa lataxac da huo' o ca qanallijlec da qaŷahuotaique da nta' a, mayi nataq' en ŷaŷamalechiguii.

ARTÍCULO 22

'Enauac na shiŷaxauapi mayi ŷalectaigui cam laŷipi ca hueta' a, namayipi ishít da qaŷauo' o aca lashieu, qataq na llalaqpi, qataq ishít da qaŷanem da ivita da iŷaxanaique. Chigoqchigui qanqoŷin aim laponguishi anom mayi ilotague' ca nta' a mayi ilotague' que' eca 'alhua, huo' otaq ana chigaqa' a na laŷipi nta' alpi naua lŷa' t 'ale' u, mayi qaŷamaxatchiguii da llic da ilo'ogue ne' ena nta' alpi, 'enauac ne' ena shiŷaxauapi iuen da ŷataqta machiguini qanqoŷin qataq ishít da nhuanau' a de'eda nsallaxa qataq da ŷalecta' aguet 'enauac na laŷipi, qataq da maichi lataxac na mayipi, qataq 'enauac na lhueneguesat da nachaalataxac qataq qaica ca 'eetega da l'ot da maichi laaxataxac da maichi nachaalataxac.

ARTÍCULO 23

'Enauac na shiŷaxauapi ishít da ŷauo' o ca l'onatac qataq da maichi lca' aique ca ishít da l'ot l'onatac, qalaxayi nalochiguii qanqoŷin da lashiichiŷaxac qataq ŷataqta ŷaŷamaxadeeta qataq qaiqataxana' l da saishít da huo' o ca na' aq nachi qaica ca l'onatac camayi.

'Enauac na shiŷaxauapi saishít da huo' otaq qalca' atagui da qai'ot ca nshiitenaguec ca l'onataxanaxac, da lashiichiŷaxac nachi 'eeta' am na leŷipi.

'Enauac na shiŷaxauapi mayi do' onataxaatac iuen daŷataqta nalochiguii qancoŷin da nshiitenaguec qataq ŷaŷamaqchiguii qanqoŷin qataq qaipactelec nachi 'en' am na llalaqpi, de'eda nshiitenaguec nateeteguet qanqoŷin da no' on lataxac camayi qataq ŷataqta qanaloqteeta' t da ivita ca laloqo', huo' otaq da iuen da qaŷamaxaji cam saxanaxa da ime, huo' otaq ca lŷa lataxac mayi ishít da mpaxatalec da lataxac camayi.

'Enauac na shiŷaxauapi ishít da l'ayii da llic da no' onataxanaxac huo' otaq da nanedeu' a ca lŷa ilotague' da no' onataxanaxac da yaqto' ishít da qaiuejlec da l'onataxanaxac.

ARTÍCULO 24

'Enauac na shiŷaxauasat sa ishít da qaillapeguem da nmataxac, qataq ishít da huo' o ca lŷa l'ottac da ŷl' imaqta, qataq naua loga' te da l'onataxanaxac naloteguet qanqoŷin cam l'ottac, qataq naua laloxoqui' da nmateec qanqoŷin qaishiite' n.

ARTÍCULO 25

'Enauac na shiŷaxauasat iuen da ŷataqta nalochiguii qaica da huo'o ca iueetac qanqoŷin, nachi 'en'am na llalaqpi, no'oita qataq ŷaŷamaqchiguii, sa ishita da iueetac ca aloq qataq qaitaunec ca lŷa ntaunaxanaxac, nataq'en iuen da qaiqataxana'I aca nshiitenaqte da ivita da qaica ca l'onatac, huo'otaq da sano'on, huo'otaq da sada' aiigue, huo'otaq da pa'aic, qataq da mashi ŷa'axaiqui, huo'otaq da huaigui ca lŷa lataxac, huo'otaq da deqat ca chigoqtapoigui na lhueneguesat ŷasouaxat cam negue't ca lataxac mayi sa ishita da lhuennataxa ca mayi.

Da 'eetec aca 'alo da deco'o qataq na nogotolec iuen da ŷataqta qantela'a qataq qanayiuapegue'. 'Enauac na nogotolec mahyi chigoxoiguilo caua namoxo'u huo'otaq da ŷaqa'a aca chigoxoigui namayipi 'enauac 'eeta 'a't iuen da ŷataqta qantela'a.

ARTÍCULO 26

'Enauac na shiŷaxauasat iuen da ŷataqta napaxaguen, qalaxyi de'eda napaxaguenataguec sa ishita da ishiiten imauec de'eda hua'auchiguii napaxaguenataguec da yaqto' ŷaŷate'n naua llico na hua'auchiguii naŷaaneguesat. Ne'ena hua'auchiguii naŷaaneguesat iuen da ŷoqta qalapaxai da qai'ot. Da qalapaxai ca llic ne'ena ŷotta'a't naŷaaneguesat qalax iuen da qaica ca ichiŷauga, qataq da qananedeu'a ne'ena qaŷoqotchiguemec naŷaaaneguesat qalax qaica da huo'o ca qaiŷotauga, qalaxyi nataq'en iuen da qailoteguet cam ŷoqta 'eesa sa ivi' da nqat ne'ena naŷaaneguesat.

Qataq 'enauac ne'ena napaxaguenataxanaxacpi iuen da ŷoqta naaxat naq'en da lauatonaxanaxac na shiŷaxausat qataq ŷa'anaqchitec cam lataxac mayi ishita da l'ot qataq da huesochiguii naq'en namayipi, nataq'en itaunec da ŷaŷateeteguet na lataxacpi, qataq da 'eetec da qanhualaxaine' ca nŷa qataq da 'eetec da nhuoteeta't na netaiguete naua ŷotta't 'ale'u, qataq 'enauacna ŷotta 'a't na l'aqtac huo'otaq ca l'amqajnataxanaxac, qataq da qalapaxai ca llic na l'otpi na ŷotta'at nta 'alpi mayi naneeta'a't da yaqto' lactapiguii na shiŷaxauasat.

Nam huo'o na llalaqpi ishita da maichi lca'ateu'a ca lataxac da napaxaguenatageuc na llalaqpi.

ARTÍCULO 27

'Enauac na shiŷaxauasat ishita da maichi chigoqchigui da ŷalegueu'a 'enauac na maichi lalamaxat lataxac cam netaigui shiŷaxauapi, qataq 'enauac na ŷaŷamaqchiguii lataxagesat na lalamaxat layaanecpi mayi ishita da ŷaŷamajni camayipi qataq ishita da ŷaconguet ca chigaqaigui.

'Enauac na shiŷaxauasat iuen da qantela'a cam lalamaxat laŷaanec, huo'otaq ca yi'oqchigui lalamaxat mayi chigaqaigui ca l'ottac laŷaanec, huo'otaq da l'ottac ananere, huo'otaq na no'on ne'enaqtacpi mayi maichi lalamaxat l'onatac.

ARTÍCULO 28

'Enauac na shiŷaxauasat ishita da qai'otec ca llic da yaqto' qaica ca machicague't da ivida'alo naua lŷa't 'ale'u, mayi qailotagueta mayi nataq'en ividaugalo 'enauac ne'ena nqataxacpi mayi mashi qanasachigui, yaqto' ŷataqta qaipacchigui da qai'ot 'enauac ca 'enapec.

ARTÍCULO 29

'Enauac na shiŷaxauasat ishita da huo'o ca l'ottac cam hueta'a, cha'ayi nachicata cam

hueta'a mayi huesochiguii da huo'o cam I'ottac qataq sa ishit da qoŷiitega.

Da ivita da huo'o ca ŷacoolec da I'ot huo'otaq cam lŷa lataxac mayi sa ishit da illapec da qai'ot ne'ena nqataxacpi, qalaq 'enauac na shiŷaxauapi ishit da qai'ot ca ŷashiita ne'ena nqataxacpi yaqto' ca mayi nataq'en ishit da huo'o ca qai'ot, qataq da qaipacchigui da qai'ot ca lataxac ŷaŷamaqchiguii, yaqto' 'enauac na shiŷaxauasat qaica ca machicage't qataq sa ishit da huo'o ca qoŷiitega.

N'ena nqataxacpi qataq da nataxac mayi huesochiguii, sa ishit da qai'onataxana da huo'otaq qaŷataŷa'aguet cam 'eetapeguec qataq nam l'auaxanec lataxac mayi lapaxai na ŷotta'a't nta'alpi mayi nanetta 'a't.

ARTÍCULO 30

Qaica qome da huo'o ca 'oonlec ne'ena nanettai mayi qanasachigui da qoŷinac chigoqchigui da I'ot ca l'aqtac ca camachicague't na nta 'alpi, da huo'otaq huo'o ca ŷanem shiŷaxauapi huo'otaq ca 'oonolec namayipi da yaqto' huo' ca ishit da ŷacoolecda I'ot, huo'otaq da ŷaueca'a't ca laŷipi da yaqto' nlaxaji ca 'oonolec ne'ena nqataxacpi, huo'otaq da nlaxaji da nataxac mayi huesochiguii, mayi mashi nasachigui qataq lapaxai.